

«ԵԿԵՂԵՑԻ ԵՎ ՀԱՍԱՐԱԿՈՒԹՅՈՒՆ» ՀԱՆՁՆԱԽՄԲԻ ԱՆ- ԴԱՄՆԵՐԻ ԱՅՑԸ ԾԻԾԵՌՆԱԿԱԲԵՐԴ

Հունիսի 17-ին Եվրոպայի Եկեղեցիների Կոնֆերանսի «Եկեղեցի և հասարակություն» հանձնախմբի անդամներն այցելեցին Ծիծեռնակաբերդ՝ իրենց հարգանքի տուրքը մատուցելու Մեծ Եղեռնի անմեղ զոհերի հիշատակին, ուր մասնակից հոգևորականներն աղոթք բարձրացրեցին հայ նահատակների հոգիների խաղաղության և հանգստության համար: Այնուհետև Ցեղասպանության թանգարանի տնօրեն տիար Հայկ Դեմոյանի ուղեկցությամբ ժողովականները շրջեցին թանգարանում և իրենց գրառումները կատարեցին հուշամատյանում:

Կեսօրին ժողովի մասնակիցները Մայր Աթոռ Սուրբ Էջմիածնում մասնակցեցին Ս. Պատարագին, որի ընթացքում նրանց ողջունեց Մայր Աթոռի Միջեկեղեցական հարաբերությունների գրասենյակի վարիչ Հոգեշնորհ Տ. Հովակիմ վարդապետ Մանուկյանը՝ փոխանցելով Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի օրհնությունն ու բարեմաղթանքները, անդրադառնալով նաև միջեկեղեցական կապերի ամրապնդման անհրաժեշտությանը: Այնուհետև «Եկեղեցի և հասարակություն» հանձնախմբի անդամ և Ռուս Ուղղափառ Եկեղեցին ներկայացնող Հայր Գեորգի Ռյաբիխը ժողովականների անունից շնորհակալություն հայտնեց Հայոց Եկեղեցուն և անձամբ Վեհափառ Հայրապետին ջերմ ընդունելության համար՝ ընդգծելով նման հավաքների կարևորությունը: Հայր Գեորգին հատկապես ընդգծեց, որ Մայր Աթոռում գտնված ժամանակ նրանք առիթ ունեցան մոտիկից ծանոթանալու Հայոց Եկեղեցու պատմությանը, ներկայիս վիճակին, ինչպես նաև ականատեսը դարձան հոգևոր կյանքի վերածննդին Հայաստանում:

Ս. Պատարագից հետո ժողովականներն այցելեցին Նոր Նորքի Հայորդյաց տուն, ուր ներկա գտնվեցին Հայորդյաց տան սաների կողմից կազմակերպված գեղարվեստական միջոցառմանը:

*ՄԱՅՐ ԱԹՈՐ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*